


E prome ehemplar di moneda conmemorativo entregá na Gobernador



Un bista di e dos tipo di monedanan cu lo wordo emití.

ORANJESTAD - Pa conmemorá e heco cu na 1999 ta 500 aña pasá cu e promer exploradornan Europeo a pone pia riba suelo Arubiano y cu esaki a marca e inicio di encuentro di culturanan y historia scirbí, Gobierno di Aruba ta emití un moneda conmemorativo.

Ayerá mainta Director di Banco Central Hans du Marchie Sarvaas a haci entrega di e promer ehemplar di oro na Gobernador mr. Olindo Koolman, e segundo

na Minister di Finanza Tico Croes y e tercer ehemplar na Director di Museo Numismático sr. Odor.

Na un banda di e moneda tin e texto 100 repsectivamente 25 Florin, Aruba, cu e imágen di un explorador Europeo, un barco di bela y un mapa di e region Caribense. E otro banda tin e texto "Tradition With Vision", - 1499-1999, cu e imágen di un círculo consistiendo di un seyo di indjan cu ta semicircular y un segmento blanco. E moneda conmemorativo aki a

wordo trahá den un version di oro y un di plata den e calidad halto di 'proof' pa coleccionista. E moneda tin un balor nominal di 100 Florin, ta rondó y tin un caliber di oro di 900/1000 y ta pisa 6,72 gram. E moneda di plata tin un balor nominal di 25 Florin y tin un caliber di plata di 925/1000. Entrante 1 di Juni venidero e moneda di oro lo ta obtenibel pa 295 Florin y e moneda di plata pa 80 Florin na Banco Central y banconan comercial di Aruba y Caribbean Mint.